

**Pɔɔl gbounsinsinn nba ki u din
sɔb ki tur
TESALONIKA TEEB
nae na**

Ki jiin 1 Tesalonika teeb gbouŋ na po

Tesalonika din tee digbansaakare Masedonia yent ni, ki li tee Rom teeb yent. Pɔɔl nba din nyii Filipi na poor po, u din mɔɔnt barŋanii na ki tur siab leŋ, ki bi teen Yiisaweira.

¹ Min Pɔɔl nan Sailas nan Timoti-e sɔbin gbouŋ na ki teen niib nba be Tesalonika ki tee ti Baa Yennu nan ti Yomdaano Yiisa Masia nigannkab na; ɲɔɔ Yennu ninkpabaun nan parmaasir-ii be nani.

Tesalonika teeb yada nan bi binbeŋ labaar

² Ti teen Yennu niipoouk i kura paak, ki tian i po yoo kur, ti Yenmiaru ni. ³ Yennu nba tee ti Baa na tɔɔnn, ti tian bianŋinba ki i teeno yada ki tuun toonŋana, nan i lomm nba te ki i tuun nan ninmɔnn bianŋinba, ki i dindann be ti Yomdaano Yiisa Masia ni chib chib na. ⁴ Ti naa waas, ti mi nan Yennu-e looni ki poŋ ganni a yii tee u yab, ⁵ kimaan barŋanii na din ki tee ti mɔb ni maan kuukɔɔ kaa ki ti din baar turini, ɲaan li bia din mɔk Seyeen yiikooe ki ti piakir ki birsuk kaa. Yoo nba ki ti din be i peŋ na, i mi taa din be bianŋinba; nan taa sommi bianŋinba. ⁶ I din waa ti binbeŋ nan ti Yomdaano binbene, ki gaar barŋanii maŋ, i farchioŋ ni, nan parpeenn nba

nyi Seyeen boor na. ⁷ Ki yaa din be bianjinba na din wann ti naa waas nba be Masedonia nan Akaya yentnba ni na baa sii be bianjinbae. ⁸ Kimaan ti Yomdaano barɲanii maɲ din nyii i boore, ki lin Masedonia nan Akaya yentnba ni; ki linba bia pukin, yaa teen Yennu yada bianjinba poɲ lin lokir kur powa. Li paak, li ji ki kpaas talas ki ti pak siar bi boori. ⁹ Niib na kur piak jiiint yaa din gaarit bianjinbae, taa din baar i boor yoo nba na, nan bianjinba ki i nyik pata ɲaan baar Yennu boor, a yii jiantir ɲoo Yennu nba fo na, ¹⁰ ki guu u Bija Yiisa, wunba tan saa nyi Yendouɲ ni ki baar na; wunba ki Yennu din fiino kuun ni, ki u fatit ɲoo Yennu wutoor nba baat na ni na.

2

Pɔɔl toona Tesalonika doo ni

¹ Ti naa waas, i moɲ mi nan taa din baar i boor na tan ki teen yanni. ² I mi taa din be Filipi doo ni, ki bi dintit biak nan fei bianjinba, ɲaan taa baar i boor, siab lek din yiab a bin goor ti wannu na, ɲaan ki ti moɲk parcheenn nba nyi Yennu boor ki moontir barɲanii maɲ ki teeni. ³ Taa din beeri linba na ki tee linba nyii faak nan dudukbiit ni. Ti din ki kpanni kaa, ⁴ ɲaan ti moontir Yennu nba loon tii moontir u maan bianjinbae, kimaan u poɲ la ki ti jaɲ nan tin dia barɲanii maɲa. Li paak, ti ki moontir a ti penn nisaarik par kaa, ɲaan ti loon tin penn Yennu nba bikii ti dudukit na pare. ⁵ I moɲ mi fanu nan ti din ki baar i boor nan momant, koo maan nba dokint nianchiɔɲ kaa. Yennu-e tee ti siara daano. ⁶ Ti din ki loon i soɔ n pakiti. ⁷ Taa tee

Masia toomiinba na, ti din mək yaak nba ki ti saa boi-i sommir powa, ɲaan ti din be i sinsuuk ni soon nnae, ki tee nan poo nba tuu gorii u waas bianjinba na. ⁸ Taa din looni bonchiann na paake ki ti din mɔontir Yennu barɲanii ki teeni; li kuukɔɔ kaa, ɲaan ti bia din teen siir nan tin chibin ti saanmanii i paak, kimaan i mantik teen ti niloɲa ki li yabita. ⁹ Ti naa waas, setik nan mɔniie, i mi taa din tuun ki di fara bianjinba. Taa din be i boor ki mɔontir Yennu barɲanii maɲ ki teeni na, ti din tuun yonnu nan nyiɔko, a ti daa tee jikir i sɔɔ paaki.

¹⁰ Yimm nan Yennu-e tee ti siaradamm ki jiin taa din be nan yimm Yiisaweira nan binbenyeɲ nan yentinu, ki kaa biit bianjinba. ¹¹ I mi bianjinba ki ti din kpaani nan jɔɔ nba tuu kpaan u waas bianjinba na, ¹² ki maant i para, ki tun kpaani a yii be binbensiak nba saa gboo Yennu numm. Ɗɔɔe yiini a wun kɔoni u tiɔɲ naan ni nan yentchiɔɲ ni.

¹³ Linba yaa paak bia te ki ti piak Yennu yoo kura na tee nnae: Taa din baar nan Yennu maan i boor na, i din gbat ki gaarir; i din ki gaarir nan nisaarik yar na kaa, ɲaan gaarir ki li tee Yennu yar. Ki li set tee ɲanne, kimaan yimm nba teenɔ yada na, maan maɲ tuun i para ni. ¹⁴ Ti naa waas, mukisbooru nba baari na, li mukisboorue mun din baar binba tee Yennu niib Yiisa Masia paak Judea yent ni na; yimm nan ɲamm dii mukisbooryeɲe. I mɔɲ mɔɲ niib nba mukisi bianjinba na, li mukisboorue ki bi niib, Juu teeb, mun din mukisib. ¹⁵ Ɗamm Juu teebe din kp̄ii ti Yomdaano Yiisa Masia nan Yennu sɔkiniinba,

ki bia mukis timm na. Linba na paak, bi ki penn Yennu pari, ki bia tee soɔ kur datai. ¹⁶ Bi yiab bi mɔŋ paak gbaa a bin gɔɔrit ki ti daa mɔɔntir Yennu barɲanii ki teen binba ki tee Juu teeb na ki bi laat tinnu. Linba nae want nan bi pukii toonbiit nba ki bi tuu tuun nae nan Yennu wutoor nba ji tan baar nan tubdatu bi paak.

Pɔɔl nba loon wun ŋamm gɔn Tesalonika teeb bianjinba

¹⁷ Ti naa waas, laa jii yoo waaminna ki ti ki be i boor ni na, ti tee nan kpeebii nae, ŋaan ti dudukit ŋarin be nani, ki ti lek bia yiab a tin baar lai nan ti ninbina, ¹⁸ kimaan yoo kur, min Pɔɔl lek loon ki n baar i boore, ŋaan ki Sintaanii gɔin sɔnu. ¹⁹ Ti Yomdaano Yiisa-i jen yoo nba, yimme sii tee ti dindann nan ti nyɔɔt, ki i paake ki ti tan saa set u boor nan parpeenn nan yuugontir. ²⁰ Setik nan mɔnii, i paake ki ti mɔk sann nan parpeenn.

3

¹ Li paak, laa ji daan tan paak ti nii yoo nba, ki ti tat biar Atens doo ni, ² ŋaan tun ti naa bik Timoti, wunba ki timm nan ŋɔɔ taan tuun ki teen Yennu ki mɔɔntir Masia barɲanii na, a wun chee i yada ki kɔɔni para, ³ ki lin te ki i soɔ daa ŋmat poor mukisuk na paaki. I mɔŋ mi nan li mukisbooru tee Yennu loomme ki turit, ⁴ kimaan taa din daa be i boor ni yoo nba na, ti din beti a bi tan saa mukisit; ki mɔtana i mɔŋ mi fanu nan li set tan teen nnae chib chib. ⁵ Li paak, laa daan tan paak n nii yoo nba, ki n tun Timoti, a

wun saan ki laan i nyik Masia sɔnu koo Sintaanii bikini, ki ti toona fara kur teen yanne-e?

⁶ Mɔtana, Timoti poŋ jenna, ki turit labaar nba penn ti para ki jiin i yada nan i lomm po. U betit a i kpan tun tian ti poe fanu, ki loon yin lat nan taa loon tin lai bianjinba na. ⁷ Ti naa waas, ti be biak nan parbiir kur ni, ŋaan taa gbat i yada po, li te ki ti para dɔɔre. ⁸ Mɔtana, li set manjit nan yaa set chib ti Yomdaano sɔnu ni na. ⁹ Ti teen Yennu niipoouk bonchiann i paak, kimaan taa mɔk parpeenn bianjinba u boor i paak na. ¹⁰ Yonnu nan nyiɔk kur ti meio nan ti para kura a wun te ki timm nan yimm n la leeb ki tin ŋamm gbeen i yada.

¹¹ Ti Baa Yennu tiɔŋ nan ti Yomdaano Yiisa n ŋamm sɔnu turit ki tin baar i boor. ¹² Yaa loon i leeb nan sɔɔ kur bianjinba na, wun te ki i lomm man n pukin bonchiann nan taa looni bianjinba na. ¹³ Nnae ki u saa chee i para, ki i sii tee popeendamm nba ki mɔk biit ti Baa Yennu boor, yoo nba ki ti Yomdaano Yiisa tan saa jen nan u yab kur na.

4

Binbeŋ nba pent Yennu par

¹ Ti naa waas, yaa din tumii ti peŋ yaa sii tuun bianjinba ki pent Yennu par na, nnae ki i poŋ tuun. Mɔtana, ti barimie ki kpaani ti Yomdaano Yiisa sann paak, ii ŋammit kii tuun nna man, ² kimaan i mi kpaanii nba ki ti din turi, ti Yomdaano Yiisa sann ni na. ³ Kimaan Yennu loon ki yii tee popeendamme ki daa

tuun bonchonchontoona. ⁴ Sɔɔ kur n bann waa sii be nan u poo, binben-yeen nan baakir sonu bianjinba, ⁵ ki daa tuun nna nan nianbiiuk binben nan binba ki mi Yennu nba be bianjinba na. ⁶ Sɔɔ daa tuun li biitbooru ki teen u loɔ nba waa Masia, koo ki nmaab u loɔ. Ti poŋ din beti li powa, n̄aan bia kpaani nan ninmɔnn, a Yennu tan saa dat binba tuun nna tuba. ⁷ Yennu ki yiint a tii tee biitdamm kaa, n̄aan u yaa tii tee popeendamme. ⁸ Li paak, wunba ki sak wannu nba na, li ki tee nisaarik yar kaa ki u yêti, n̄aan u yêt Yennu nba teeni u Seyeen na mɔŋ mɔŋe.

⁹ Li ki kpaas talas ki tin sob gbouŋ ki tiari yaa sii loon Masiaweira bianjinba. Yennu poŋ wannu bianjinba ki i sii loon i leeba. ¹⁰ Ki i set tuun li bianje na, ki loon ti naa waas kur nba be Masedonia yent ni na. Ti naa waas, ti barimie, ii n̄ammit kii tuun nna man, ¹¹ ki n̄aan ki lii tee i dudukit ki yii be soon nna, ki i baka-ii be i mɔŋ toona ni, kii tuun kii dint i mɔŋ, nan taa poŋ din beti bianjinba sinsinn na. ¹² N̄anne saa te ki binba ki tee Masiaweira na n turi baakir, ki li ji kii kpaas talas ki yin jɔɔb i mɔŋ ki denn sɔɔ, i bonlonkara paaki.

Ti Yomdaano jenu labaar

¹³ Ti naa waas, ti loon yin bann barmoniie ki jiin Masiaweira nba kpo na po, ki daa mɔk parbiir nan binba ki mɔk dindann nba mɔk na.

¹⁴ Ti teen yada nan Yiisa din kpo n̄aan bia fiir kuun niwa; li paak ki ti bia teen yada nan Yennu tan saa te Yiisa n jen nan u weira nba kpo na.

¹⁵ Taa wanti linba na tee ti Yomdaano mɔmaame; ti Yomdaano man jenu daar, damm nba tan sii

be bi manfoa ni na kan dɔŋ binba kpo na ki chet Masia sanpaapo, ¹⁶ kimaan ti Yomdaano tan saa nyi Yendɔuŋ ni ki sik nan tintianpaari, nan malaka saakɔɔ yiinii, nan Yennu naatunn mɔnii, ki Masiaweira nba kpo na tan saa fiirewa; ¹⁷ li yoo, damm nba tan sii be bi manfoa ni na nan ŋamm saa chet ti Yomdaano sanpaapo; ki timm nan ti Yomdaano ji saa taan leeb ki be mɔkmɔk nan mɔkmɔk. ¹⁸ Li paak, ii dia mɔmaan na kii maant i leeb para.

5

Teent siir ti Yomdaano jenu po

¹ Ti naa waas, li ki kpaas talas ki tin sɔb wanni yoo nba ki linba na tan saa tumi, ² kimaan i mɔŋ poŋ mi fanu nan ti Yomdaano jenu daar maŋ tan sii tee nan nanyuko nba tuu baar nyiɔk bianjinba nae. ³ Yoo nba ki niib tan sii yeen a “Parmaasir nan laafia be” na, li yoo mane ki biiru tan saa baarib yiama, nan matyiaru nba tuu baar poo bianjinba na, ŋaan bi tan kan fit nyi li biiru ni. ⁴ Ti naa waas, yimm ki be bunbɔnn ni kaa; li paak, li daar tan kii tee nan nanyuko baaru na kaa i boori, ⁵ kimaan i tee yentu waase. Ti ki tee nyiɔk yab kaa; ti ki be bunbɔnn ni. ⁶ Li paak, ti daa dɔɔ gɔont nan nisiab nba tuun bianjinba na, ŋaan tii nyoi kii sub, ⁷ kimaan binba gɔont na gɔont nyiɔko, ki binba nyu daan yib na mun yib nyiɔk. ⁸ ŋaan timm nba ki tee nyiɔk yab na, tii sub, ki jii yada nan lomm ki lia, ki lii tee nan naagbankɔŋir na, ki bia jii tinnu dindann ki yir, ki lii tee nan kut fokirik na. ⁹ Yennu din ki gannit

a wun tan dat ti tuba kaa, ɲaan u gannit a tin la tinnue ti Yomdaano Yiisa Masia paak; ¹⁰ ɲooe din gaar ti paak ki kpo, a ti-i lekii kpo amii ti-i be u jenu yoo man, timm nan ɲoo n taan kii be. ¹¹ Li paak, ii kooŋt i leeb para kii sommit i leeb nan yaa poŋ tuun bianjinba motana na.

Kpaanjoontii nan foontjoontii

¹² Ti naa waas, ti barimie, a i baka-ii be binba tuun ti Yomdaano toonn i boor, ki tee i yudamm u soŋu ni, ki teeni kpaanii na ni. ¹³ Ii teemm baakir nan lomm nba yab, kimaan bi toona nba ki bi tuun na paak. Ii be nan leeb nan parmaasir man.

¹⁴ Ti naa waas, ti barimie, a yii kpaan gban-nyakdamm, ki chee jaŋmaandamm para, ki somm tarii, ki di sukuru nan soŋ kura. ¹⁵ I daa tuun biit ki jiiŋt biit paaki, ɲaan ii te ki lii tee i lor yoo kur nan yin tun linba ɲan ki tur i leeb nan soŋ kur.

¹⁶ Ii mək parpeenn yoo kur man, ¹⁷ kii mei Yennu yoo kur, ¹⁸ kii teen Yennu niipoouk bon-siar kur ni, kimaan Yennu nba loon bianjinbae na, yaa tee Yiisa Masiaweira na paak.

¹⁹ I daa goi Yennu Seyeen nba loon bianjinba; ²⁰ i daa fiakit Yennu soƙiniinba maami, ²¹ ɲaan ii tuu mintaa ki bikin bon-siar kur, ki gaar linba ɲan, ²² ki nyi biitbooru kur ni.

²³ Yennu nba teent parmaasir na tiɔŋ n teeni popeendamm nan barmonii, ki dia i sei nan i manfoa nan i gbanant mun, ki li daa mək biit, ti Yomdaano Yiisa Masia jenu yoo manji.

²⁴ Yennu nba yiini na saa tun nnawa, kimaan u tee barmonii daano.

²⁵ Ti naa waas, ii mei Yennu kii teent man. ²⁶ Ii foont Masiaweira na kura ki kpamii.

²⁷ Ti Yomdaano sann nie ki n kpaani, ii karin gbouŋ na ki tur Masiaweira na kur.

²⁸ Ti Yomdaano Yiisa Masia ninkpabaun-ii be nani.

Yennu Gbouj Moor
Bimoba: Yennu Gbouj Moor Bible

copyright © 2003 Wycliffe Bible Translators, Inc.

Language: Bimoba

Contributor: Wycliffe Bible Translators, Inc.

All rights reserved.

2020-11-16

PDF generated using Haiola and XeLaTeX on 21 Feb 2024 from source
files dated 29 Jan 2022

00d89ba0-4677-52d9-9bc5-aa3d7c5c966d